

Roengz Bit Baenz Va Faenzcieng Ndeiraeuh

妙笔生花 文采飞扬

——Geiq Gaiq Daeuz Daengx Gih Siujhagseng Yienhcieingz Sawcuengh Faenzcieng Doxdax

□ bonjbauq gicej Cau Dwzfeih/赵德飞



▲ Veiz Lanzmingz cucangj fat ciengj hawj siujhagseng ndaej it daengj ciengj haenx.

▲ Gvangjsih Minzcuz Dayoz Vwnzyozyen fu-gyausou Luz Yungjbinh daiqbiuj bingzvejvei guh diemjbingz.

◀ Swcigih Gyauyuz Dingh Minzgyaucu cucangj Veiz Lanzmingz caeuq siujhagseng ndaej it daengj ciengj haenx hab'ingj.



▲ Sawcuengh faenzcieng doxdax yienhcieingz.

10 nyied 22 hauh, Gaiq Daeuz Daengx Gih Siujhagseng Sawcuengh Faenzcieng Doxdax youz Swcigih Gyauyuz Dingh cawjbanh, Guengjsae Minzcuz Gyauyuz Fazcanj Cungsim bangbanh haenx youq Namzningz Si Sihyenz Fanden funghranz haihoih banh. 69 boux siujhagseng daj daengx gih 21 aen yienh(s, gih) daeuj haenx camgya baez yienhcieingz Sawcuengh faenzcieng doxdax neix.

Baez doxdax neix faen A、B song cuj, A cuj dwg 3~4 nienzgaep hagseng camgya, B cuj dwg 5~6 nienzgaep camgya, doxdax bauqmingz yungh gij fuengfap hagseng gagnyienh bauqmingz; Cuengh Gun song saw vah hagdangz yienh(s, gih) gyauyuzgiz doigawj hagseng maenhndei; yienh(s, gih) gyauyuzgiz senjdingh bouxcamgya bae camgya daengx gih doxdax. Caemhcai q iucingj Swcigih Minzyijvej, Cungguck Minzcuz Yijvwnz Fanhyizgiz、Guengjsae Minzcuz Daihhag、Guengjsae Sawcuengh Hagdangz daengj danhvei 10 boux lauxhangz guh bingzvej baez yienhcieingz Sawcuengh faenzcieng doxdax neix.

Doxdax yienhcieingz, gyoengq siujhagseng bouxboux simdingh gagsaeng, yungh Sawcuengh raeuz-rwdrwd sij ok baenz aen baenz aen gojgaeq ndeigyaez. Gyoengq siujhagseng caenhcingz sij, sij ok gij gejdoug doiq doxgaiq moq, gij siengjmuengh daengzcog, aeu gij siengjmuengh gyaundeidei vaq baenz saehyinx lwnyiez, ndawde yienh'ok le gij angqyangz seiz iq lwnyiez lai raeuh. Yaepyet mbaw ceij hoengq sij faenzcieng haenx couh sij rim lo.

Doxdax sat le, Sanglinz Yen

Dafungh Cin Vangzcouh Siujyoz seiq nienzgaep hagseng Lij Danh doiq gicej naeuz: "Baez doxdax neix faenzcieng daezmoeg haemq ngaih, gou sij le 400 lai cih, mauhgvaq gij soqmoeg doxdax iugouz haenx, gou roxnyinh gig ngaih, danghnaeuz baez laeng lij banh, gou lij siengj camgya baez dem."

Ginggvaq bingzvej yienhcieingz gaj gienj hawj faensoq, baez doxdax neix A cuj bingzsenj ok 4 boux it daengj ciengj, 8 boux ngeih daengj ciengj, 10 boux sam daengj ciengj; B cuj bingzsenj ok 6 boux it daengj ciengj, 12 boux ngeih daengj ciengj, 19 boux sam daengj ciengj.

Swcigih Gyauyuz Dingh Minzcuz Gyauyuzcu cucangj Veiz Lanzmingz youq fat ciengj denlij naeuz, Vahcuengh dwg gij hongdawz siengjnaemj caeuq doxgyau youqgaenj beksingq Bouxcuengh, hix dwg gij hongdawz caeuq caidij youqgaenj swncienz、cienz-boq vwnzva Bouxcuengh. Haiguh baez Sawcuengh faenzcieng doxdax neix muzdiz dwg daezsang naengzlig hagseng yungh Vahcuengh Sawcuengh, gungganq gij yinxdaeuz hagseng hagsib Sawcuengh, daezhawj aen daizheiq he hawj hagseng Bouxcuengh langhbaij bonjfaenh, fungfouq gij saedceij ndawhag Cuengh Gun song saw vah hagdangz, ndaejdaengz gij Cuengh Gun song saw vah sonhag gyauyenz vunsik moq aeu "sai" coi "yenz", aeu "yenz" coi "gyau", "sai、yenz、gyau" dox giethab haenx, caux ok gij heiqfaenh ndei Cuengh Gun song saw vah sonhag gyauyenz, coicaenh gih raeuz hong Cuengh Gun song saw vah gyauyuz hwnghat.

Youq gwnz fat ciengj denlij, Guengjsae Minzcuz Daihhag Vwnzyozyen fu' gyausou Luz Yungjbinh daiqbiuj bingzvejvei guh diemjbingz. Gyoengq bingzvej nyinhnaeuz baez Sawcuengh faenzcieng doxdax neix, miz ndei, hix miz rwix. Gij ndei dwg: Faenzcieng daezcaiz gvangq, gyoengq siujhagseng ndaej daj henz ndang bonjfaenh roengz-fwnz, sij gij vunz henz ndang vunzcae, lauxsae, doengzhag daengj; faenzcieng neiyungz miz gag guhcawj yi, ndaej sij ok gij cingz ndaw sim, haenh caen, sienh, gyaueu ndaw saedceij; gij neiyungz faenzcieng cungsaed, gezgou caezcingj, dingzlai siujhagseng ndaej sij ok gij saehgienh fatseng seizgan, deihdienj, vunz, ginggvaq daengj, caemhcai sij ok caencingz dem; dingzlai siujhagseng Sawcuengh sij ndaej doengswnh dangqmaz, sij ndaej gveihfan, sawloih fungfouq, caemhcai rox yungh gij fuengfap siuhswz dem, hawj faenzcieng engqgya sengdoengh hingzsieng. Hoeng lij miz dieg mbouj gaeuq ndei, miz mbangj siujhagseng gyoepsij Sawcuengh nem sing, yinh, diuh lij caengz sug, Sawcuengh sij ndaej loekloeng haemq lai; neiyungz faenzcieng bien daez, liz daez; neiyungz faenzcieng cungzfuk, fanfoek sij daengj. Gyoengq bingzvej genyi: Gak aen Cuengh Gun song saw vah hagdangz aeu gyagiengz doeg sij lienhguh sing, yinh, diuh Sawcuengh, hawj hagseng rox yungh Sawcuengh; Cuengh Gun song saw vah lauxsae aeu sonyinx hagseng sij faenzcieng, daj ngaih daengz hoj, daj cih, swz, gawq, daengz faenzcieng gyagiengz sonyinx hagseng.



▲ Bingzvej nyinhcaen gaj gienj.



▲ Doxdax sat le lauxsae cam faenzcieng sij ndaej baenzlawz yienh.



▲ Doxdax sat le siujhagseng ciepsouh gicej caijfangj.